

İOANI P'ƏMCİ NAMAK' Bəşin əyit

İoanen me namak'a iz süft'in namak'i baç'anexun, həysət'in T'urşıya bakala Efesa, İsusi nanaxun baki'tuxun təxminən 90 usen oşane şampe. Şot'in iz süft'in namak'a bütüm vëbakalxoynak'e şampey, me namak'a isə izi "c'ək'eşi xanım" s'i tadi vëbakalxoy cəmiyəteynak'e şame.

Me namak'i boş İoanen İsusə q'abulbit'oğoy gelet'ay düz yaq'a baksuna, Şot'ay sakala işiği boş yəşəyinqbsuna ibaki, izi mot'o görə hetər mütq baksunane ak'est'a. Ama şot'in hələl ayığ baki əfci zombalxo nu feret'baksuna, sun-suna çuresuna, hamal Q'onçux İsusi me dünyəne amdarxoy çark'eseynak' hari sa Seri Bakalo k'inək' q'abulbsunane k'ale. Seri Bakalo isə Buxaçux baksun me dünyəne amdar k'inək' hariyone!

¹ Vəynak' me namak'a şamk'ala, efi Seri Bakalt'u çalxi "c'ək'eşiyorox" * baksuna görə vəx ük'en çureğala ağsaq'q'alaxun xeyirq'an baki! Ama vəx saycə zu tətə, Şot'o çalxalt'oğoy bitot'in çuresa.

² Axırı Seri Bakalo yast'ane, həmişəəl yaxun bakale.

* **1:1 1:1** - İoanen memiya me c'ək'eşit'oğə "c'ək'eşi xanım q'a izi əyləxe" nex. Mo isə bakes banekon ki, maninesa vëbakalxoy cəmiyətə tadeşi sa s'ine.

3 Barta Buxaçuğoxun q'a İz Ğar bakala İsus Xrist'osaxun eğala ük' bok'ospsun, xeyirxaxluğ saal serluğ yaxunq'an baki. Mot'oğö serina çalxsunen q'a suna çuresunen yəşəyinq'bsunenyan haq'es bakon.

Sun-suna çurekinan

4 Ef arane seri bakala yaq'en taşi Buxaçuğoy əmirxo əməlbəlxoy baksuna ibaki heq'ədər müqəzbaki!

5 Ay bezi c'ək'eşiyorox, həysə zu vəynak' şamk'alo təzə sa əmir tene. Mo İsusi yaq'en taşi ğinaxun yaynak' laxeşi k'anune - suna çureğalayan.

6 Çuresun isə Buxaçuğoy yaq'en taşi, Şot'in yast'a aksun çureğalt'oğö beş əməlxon ak'est'une. Ef ömüri hər ğinal me yaq'en tağala ğinaxun ibaki əmiren c'ovakest'anan.

7 Mot'o gele əfçiduğalxo meydane c'eysuna görəz vəynak' şame. Şot'oğon İsus Xrist'osi sa amdar k'inək' me dünyəne eysuna tet'un q'abulbsa, şorox bito əfçiduğalxo q'a Xrist'osi düşmən bakaloroxe.

8 Bəğanan ki, efi memaçaq biyorox maq'an batk'i, layiğ bakala mükəfətəl tam haq'es bakanan.

9 İsus Xrist'osi zombsunaxun c'eri q'erəz yaq'en tağalo Buxaçuğoxun tene. Ama Xrist'osi laxi yaq'axun nu c'eri Şot'ay pit'oğö əməlbalo ham Buxaçuğö İşane, ham Ğara.

10 Ef t'öğöl hari me düzgün zombsunaxun əxil bakala sa zombsun eçalt'u nə ef k'ojurxo ma bartanan, nə iz bəş ma c'ekinan.

¹¹ Şot'aynak' ki, metər amdara iz k'oya q'abulbalo şot'ay şər əməlxo şərik bakine baksə.

Dirist'oğonbsun

¹² Vəynak' gele şeyez şamk'oy, ama mot'oğon namak'en upsun tez çureşi, Buxaçuğon bark'ayin vəxun ef t'öğöl hari exlətp'oz, beş müqluğal gərbaki lap bəl bakale.

¹³ Vəynak' miya bakala efi c'ək'eşi xunçey əyloğon dirist'uğt'un yaq'absə.

Udi Bible

Udi Scripture translation

copyright © 2020 Translation Services International Ltd. and Wycliffe Bible Translators, Inc.

Language: (Udi)

Contributor: Wycliffe Bible Translators, Inc.

All rights reserved.

2025-07-09

PDF generated using Haiola and XeLaTeX on 26 Jul 2025 from source files dated 9 Jul 2025

174556f0-71b4-5f1c-b512-2117b07ebbf0